



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Novembru 2009

Edisaun : Novembru 2009

TRIBUNAL DISTRITAL DILI RONA ONA TESTEMUÑA NA'IN 52 BA KAZU ATTENTADU HUSI TESTEMUÑA NA'IN 175 NE'EBE REZISTU ONA

Iha loron Quarta Feira 11 de Novembru 2009 Tribunal Distrital Dili nafatin hala'o julgamentu ba kazu ho numero 79/c.ord/09/TDD konaba atentadu ba rezidensia Prezidente da Republika no Primeiru Ministru Timor Leste. Kazu ne'ebe ema hotu hatene ka familiar liu naran "Attentadu 11 de Feveireiru" ou "*Attentadu Onze de Feveireiru*".

Kazu ne'e prosesa tiha ona iha tribunal durante fulan haat nia laran atu nune'e bele rona depoimentus husi testemuña sira ne'ebe mak deskumfia involve iha akontesimentu ne'e. Durante tempu ne'e nia laran, tribunal rona ona testemuña hamutuk na'in 52 husi total testamuña 175 ne'ebe defini ka aponta tiha ona husi Tribunal Distrital Dili. Prosesu julgamentu ne'ebe hala'o koletivamente ne'e preside husi Juiz Prezidente Dr. Costançio Basmery no akompañadu husi Juizes Adjuntu Dr. Antonino Gonçalves no Dr. Deolindo dos Santos.

Ba prosesu julgamentu ida ne'e tribunal notifika testemuña na'in rua husi testemuña na'in tolu ne'ebe mak aponta tiha antes, ho ida-idak nia inisial mak ADS no PDR. Nune'e testemuña seluk ho inisial DCS ne'ebe mos hetan notifikasaun sai hanesan testemuña seidak pronto ho razaun kondisaun saude mak la permite bazea ba deklarasaun husi hospital. Testemuña na'in rua ne'ebe mak marka sira nia prezensa iha tribunal servisu hanesan korpu seguransa ba Primeiru Ministru Xanana Gusmão desde tinan 2002.

Testemuña ADS iha ninia depoimentus, haktuir katak iha loron 11 de Feveireiru 2008 testemuña fo seguransa ba Primeiru Ministru Xanana Gusmão mai Dili, no sira hetan assaltu husi ema deskoñeseidu, assaltu ho armas de fogu ne'ebe rezulta kareta ne'ebe mak lori PM hetan estragus iha vidru partensia kotuk ninian no roda ida partensia kotuk ninia nakfera tanba hetan tiru iha akontesimentu ne'e, maibe PM ho ninia eskoltu sira konsegue ses-an husi assaltu ne'e.

Iha parte seluk, testemuña PDR momentu akontesimentu 11 de Feveireiru 2008 desloka hela iha Balibar, maibe testemuña hatene akontesimentu ne'e husi ninia kolegas sira ne'ebe mak halo seguransa iha rezidensia Prezidente da Republika iha kalan. Testemuña mos hatene assaltu hasoru Primeiru Ministru wainhira viazen mai Dili. Informasaun ne'e

testemuña hetan husi Polisia ONU ne'ebe mak foin fila husi lokal do krime besik Dare no testemuña rasik la hare ho matan akontesimentu assaltu ne'e.

Tuir observasaun JSMP, husi total testemuña ne'ebe mak fo ona sira nia depoimentus tuir JSMP katak prosesu julgamentu ne'e se la'o normal maka sei han tempo mais ou menus fulan ualu até tinan ida, tanba prezensa testemuña sira ne'ebe mak apontadu no notifikadu ona husi tribunal atu fo sira nia depoimentus iha prosesu julgamentu dala ruma ka dala barak la kumpri ba notifikasaun husi tribunal.

Bazeia ba monitoramentu ne'ebe JSMP halo, nota katak parte tribunal la konsistente no la firme ba testemuña sira ne'ebe mak la marka sira nia prezensa ka sira ne'ebe mak la obedese ba notifikasaun husi tribunal atu tuir julgamentu sen iha informasaun klaru. Tanba kada prosesu julgamentu testemuña sira ne'ebe mak hetan karta notifikasaun sempre iha testemuña ne'ebe mak la marka prezensa hodi tuir prosesu julgamentu ho razaun sira ne'ebe mak la klaru ou sei hala'o hela kna'ar ne'ebe mak dook husi Dili.

Tanba ne'e, JSMP hein katak tribunal tenke mantein no firme hodi bele obriga testemuña sira ne'ebe mak hetan ona notifikasaun atu bele kumpri ba orden tribunal, nune'e bele aselera prosesu julgamentu no bele prevene kazu pendentis ne'ebe mak tuir loloos la bele akontese.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun E-mail: luis@jsmp.minihub.org

Landline: 3323883

.